

Il Grischun paja 2019 pli pauc per l'energia electrica

Repower fa recurs avant Tribunal federal

DA MARTIN CABALZAR

■ **En la gronda part da la Svizra tegnan ils tegnaichasas per 2019 il medem pretsch per electricitad sco l'onn current. En il Grischun ed en la Svizra centrala profita la clientella schizunt d'ina reducziun dals pretschs.** Enfin la fin d'avust en ils producents d'energia obligads da communitgar publicamain las tariffas per il provediment electric da basa. I sa tracta da tariffas regladas che llian ils clients finals vid lur distributurs.

Pretschs stabils per 2019

Sco in dals ultims producents d'energia electrica ha la Romande Energie publicità il venderdi passà sias tariffas. Il concern d'energia dal Vad vul cunzunt mantegnair la stabilitad da pretsch per ils tegnaichasas privats e per manaschis pitschens, sco Romande Energie ha communitgà. Las duas categorias da clients menziunadas possian schizunt profitar d'ina pitschna reducziun da las tariffas per 0,1 pertschient e quai malgrà la tendenza creschenta dals pretschs sin il martgà d'energia. Er en auters lieus da la

Svizra na ston ils consuments betg quintar cun in augment dal pretsch d'energia. Sin fundament d'ina retschertga fatga tar 31 dals gronds producents d'energia è l'Associaziun svizra da las interpresas electricas vegnida a la conclusiun ch'ils pretschs per il provediment da basa vegnian a restar per gronda part stabils. Il circol dals interrogads cuarcia ensemen radund la mesadad dal consum d'electricitad en Svizra.

Reducziuns da pretsch en il Grischun ed en la Svizra centrala

La retschertga ha plinavant documentà ch'intgins tegnaichasas pon schizunt profitar d'ina reducziun dal pretsch d'electricitad. Uschia sbassa la «Central-schweizerische Kraftwerke AG» sias tariffas per clients privats tant tar il current sco tar l'energia per 10 pertschient. Tar il concern d'energia dal Grischun, Repower, vegn il consum d'energia ad esser 2019 per radund 4,5% pli bass che quest onn. Er il concern «Berner Energie Konzern» (BKW) preveda ina «reducziun minimala» dal pretsch d'energia. Praticamain sin il medem nivel restan las tariffas

d'electricitad a Turitg. Là paja in tegnaichasa mesaun tenor infurmaziun da las «Städtzürcher Elektrizitätswerke» (EWZ) l'onn proxim radund 0,8 pertschient pli pauc. Er en la citad da Winterthur resta il pretsch d'energia pli u main sin il nivel da quest onn.

Augments da pretsch a Biel e Zug

In augment da pretsch considerabel datti denton a Biel. Las abitantas ed ils abitants da Biel vegnan a stuair pajar l'onn proxim en la media nov pertschient dapli per l'energia electrica. Energie Biel auza las tariffas pervi dals pretschs augmentads sin il martgà d'energia.

En la Svizra orientala cun excepziun dal Grischun vegnan ils pretschs a s'augmentar per 4,8 pertschient. Tenor las ovras electricas da S. Gagl ed Appenzell munta quest augment en la media dals tegnaichasas trais francs per mais. Era las abitantas ed ils abitants da Zug ston pajar dapli. Las «Wasserwerke Zug» vegnan ad augmentar il pretsch d'electricitad per clients privats e manaschis d'artisanadi en la media per 1,2 pertschient.

Las midadas dals pretschs d'electricitad vegnian dentant a variar fitg tut tenor il quantum e la caratteristica da consum dal singul client. Per in'abitaziun da tschintg stanzas equipada cun ina platta electrica ed in adiever da 2500 kWh per onn possian ins schizunt quintar cun ina reducziun da 0,4 pertschient, scriva l'ovra electrica.

Summa summarum consistia il pretsch d'energia la finala da las trais cumponentas: rait, energia e taxas e taglias. Entant ch'ils custs per l'utilisaziun da la rait da transmissiun vegnan probabel a sa recudir, dastgassan ils pretschs d'energia crescher tendenzialmain, sco quai che la retschertga tradescha. Quels dependian dentant grondamain da la strategia da producziun e cumpra dals singuls concerns d'electricitad.

Repower fa recurs tar il Tribunal federal

Repower aveva pers avant il Tribunal administrativ federal il recurs cunter la decisiun da la cumissiun federala d'electricitad en la disputa partenent la metoda da quintar las tariffas. Tar questa disputa tranter ElCom e Repower vai per la dumonda sch'igl è da resguardar en la quintaziun da tariffas era las participaziuns ed ils contracts cun ovras idraulicas per il commerzi d'energia naziunal ed internaziunal. En quest connex aveva la ElCom crititgà en sia disposiziun Repower pervi da la quintaziun da las tariffas dal provediment da

basa per ils onns 2009 e 2010. La fin da zercladur 2018 ha il Tribunal administrativ federal lura dà per gronda part raschun ad ElCom.

Sco che la Repower scriva hajan els entant examinà la sentenza e decis da far recurs tar il Tribunal federal. Per la Repower sa tractia dad ina dumonda da princip che saja anc averta. Repower saja uss interessà che questa dumonda vegnia sclerida definitivamain dal suprem tribunal svizzer per uschia avair ina segirezza da dretg per decisiuns futuras.



Il concern d'energia grischun Repower fa recurs tar il Tribunal federal.